

# Fahnebläser & Auphornschwinger



**Texscht : Mike Sutter**  
**Musig : Mike Sutter**

**Me hett gärn chli Ornig, leit wärt uf Pünktlechkeit  
Norme, Gsetz u Regle gä z'Gfüeu vo Sicherheit  
Korräkt, diskret, pragmatisch, bieder u dezänt  
Betitelig aus Bünzli giut aus Komplimänt**

**Me midet Überraschige, me bruucht keni Wunger  
Was obe isch, isch obe – was unger isch, isch unger  
Was vore isch, isch vore – was hinger isch, isch hinger  
Im Land vo de Fähnebläser und de Auphornschwinger**

**Nid jede mit äre Pischtole isch ä Polizischt  
Nid jede mit're rote Nase isch ä Sozialischt  
Nid jede mit me Bebewage isch dr Vater vo däm Ching  
Nid jede wo s'Schöne rund um sich nid gseht isch bling**

**Nid jede wo d'Froue ufne flüge schteit uf Froue  
Nid jede wo ä Roue schpiut im Läbe schpiut ä Roue  
Nid jede wo tagii taguus chlöhnet isch ä Buur  
Nid jede wo Di aasingt beriicheret d'Kultur**

**Tja, nid säute trüegt dr Schiin  
Mängisch, si d'Ungerschide fiin  
S'isch öppedie mou öppis nid e so wie's sötti si  
U mir wo viufach d'Wohrheit nid wei wohr ha rassle regumässig dri**

**Nid jede wo ne grosse Chare fahrt dä hett ne zauht  
Nid jede wo pressiert hett ume Egge öppis g'chlaut  
Nid jede wo für d'Freiheit kämpft isch ä Terrorischt  
Nid jede wo kes Gwehr im Schaft hett isch ä Pazifischt**

**Nid jede wo zur Fläsche griift tuet öppis gäge Durscht  
Nid jede wo zum Grosi luegt isch ä flotte Burscht  
Nid jede wo ne grossi Röhre füehrt hett öppis z'säge  
Nid jede wo chli chliini Ouge hett isch zweni gläge**

**Me midet Überraschige, me bruucht keni Wunger  
Was obe isch, isch obe – was unger isch, isch unger  
Was vore isch, isch vore – was hinger isch, isch hinger  
Im Land vo de Fähnebläser und de Auphornschwinger**

**Nid jede wo sech nach dr Dili schtreckt isch Malermeischer  
Nid jede wo vo Gschpängschter verfougt wird gloubt a Geischer  
Nid jede wo si Hang erhäbt, mäudet sich zu Wort  
Nid jede wo chli mitlouft tribt regumässig Sport**

**Nid jede mit me bruune Gring isch viu ar früsche Luft  
Nid jede wo erfrüschend schmöckt verschtrömt si eget Duft  
Nid jede mit me dicke Ranze isch ä Feus ir Brandig  
Nid jede wo höch flügt befasst sech mit dr Landig**

**Tja, nid säute trüegt dr Schiin  
Mängisch, si d'Ungerschide fiin  
S'isch öppedie mou öppis nid e so wie's sötti si  
U mir wo viufach d'Wohrheit nid wei wohr ha rassle regumässig dri**

**Nid jede wo politisiert tuet's für Vouk u Schtaat  
Nid jede populär Populisch wird Bundesrat  
Nid jede Farbig uf dr Gass isch ä Drogediiler  
Nid jede Fundamäntalisch macht s'Syschtem schtabiler**

**Nid jede wo sech Rose poschtet bringt se sire Frou  
Nid jede wo Schpektaku macht bietet eim ä Show  
Nid jede Socke-und-Sandale-Typ schteit näb de Schueh  
Nid jede wo hie läbt, hett zum Läbe gnue**

**Me hett gärn chli Ornig, leit wärt uf Pünktlechkeit  
Norme, Gsetz u Regle gä z'Gfüeu vo Sicherheit  
Korräkt, diskret, pragmatisch, bieder u dezänt  
Betitelig aus Bünzli giut aus Komplimänt**

**Me midet Überraschige, me bruucht keni Wunger  
Was obe isch, isch obe – was unger isch, isch unger  
Was vore isch, isch vore – was hinger isch, isch hinger  
Wüukomme - im Land vo de Fähnebläser und de Auphornschwinger**